

**Naalakkersuisuni 2008-mi naliliisimaneq nangillugu kingusinnerpaamik UKA 2014-imi “nilammik imermillu avammut tunisassiorneq” pillugu inuussutissarsiornermik suliniummut, ilanngullugulu 2004-mi anguniakkat anguneqarsimanerannik nassuiaammik imaqartumik Naalakkersuisut naliliisummik saqqummiussinissaannik peqquneqarnissaat pillugu Inatsisartut aalajangiiffigisassaatusiunnersuut.**  
(Demokraatit)

### **Akissuteqaat:**

(Inuussutissarsiornermut Aatsitassaqaarnermullu Naalakkersuisoq)

### **Siullermeerneqarnera**

2008-mi aqquasaakkat qeqqannik naliliisummik malitseqartitsisussamik inuussutissarsiornermik suliniummut “nilammik imermillu avammut tunisassiornerup” naliliiffiginissaa pillugu siunnersuummut qujavunga.

Nilammik imermillu avammut tunisassiornermut suliniutini ilisimatitsisarnermut oqartussanillu suliaqartarnermut tunngatillugu pingaarnertut sinaakkutissat pissarsiarineqarput. Niuerfeqarfimmi piviusutut akinik qulaajaaniarluni misissuisoqarluni, uppersaatit pitsaassusissanillu aaqqiissutissanik atuutsitsisoqalerluni, aammalu qinnuteqarnissamut akuersissuteqarnissamullu ingerlattakkanik pisariinnerusunik pilersitsisoqarsimavoq. Allaffeqarfimmissaaq pilersitsisoqarpoq aningaasaliisartunit soqutiginnittunit saaffiginninnernit isumaginnissinnaasumik, kiisalu nilammik imermillu inuussutissarsiorfimmik ussasaaruteqarfiusumik nittartagaliortoqarluni.

Maannakkut suliaassalersoq tassaavoq nilammik imermillu avammut tunisassiornerup suliniutaaneraningaannit tunisassiornermut ingerlateqqinnissaa. Avammut tunisassiornermi manna tikillugu annikitsunnguut inerniliissutit eqqarsaatigalugit inuussutissarsiuutaasumut sinaakkutit pitsanngorsarnissaat pingaaruteqartuusoq isumaqatigaarput. Tassunga atasutut nunanut allanut sinneqartoorutinit pissarsiarisartakkat (royaltymut) tunngatillugu assersuussaqartumik nalunaarusiortoqarpoq. Kalaallit Nunaanni ingerlatseqatigiinnut royaltymut tunngasunik unammillersinnaassusilinnik periarfissanik pilersitsinissamik pisariaqartitsisoqartoq nalunaarutip takutippaa. Taamaattumik royaltymut akilisarnermut 2012-imi juunimi ilusiliamik nutaamik atuutsitsisoqalissasoq aalajangiunneqarpoq, tassani akiliut imermut literikkaamut 0,40 kr.-nit 0,10 kr.-mut appartinneqarluni. Akuersissummik piginnittunut tunisisinnaassutsimik pitsanngorsaanissaa tassuunakkut naatsorsuutigineqarpoq, aatsaalli ukualunnguit qaangiuppata ilutsip taassuma nutaap sunniutaa uuttorneqarsinnaalissaaq.

Nilammik imermillu immikkoortoqarfimmut Naalakkersuisut periusissiaat 2013-imut killeqarpoq, tassungalu malitsigisitatut periutsimik naliliisoqassasoq pilersaarutaavoq. Nilammik imermillu tunisaqarnerup iluani inuussutissarsiorfimmik ineriartortitsinissamut aporfissaqartoqarsinnaanerannik, ilanngullugulu avammut tunisiniarnermi imigassatut imermik namminersuutigisatut tunisassiornerup siuarsarnissaanut sunik iliuuseqartoqarsinnaanera

naliliinerup erseqqissassavaa. 2014-imi ukiakkut ataatsimiinnermi naliliineq Inatsisartunut saqqummiunneqarumaarpoq.

Tamatumuuna siunnersuut akuerisassanngorlugu innersuutigineqarpoq.